

四庫全書

經部

欽定四庫全書

經部

禹貢說斷卷二

詳校官給事中臣李臺

通政使司副使臣莫瞻菴覆勘

總校官庶吉士臣倉聖脉

校對官中書臣吳甸華

謄錄監生臣陸維新

欽定四庫全書

禹貢說斷卷二

宋 傅寅 撰

海岱及淮惟徐州

釋地曰濟東曰徐州郭氏註曰自濟東至海

孔氏曰東至海北至岱南及淮

杜氏曰或云因徐邱為名

李氏曰淮海間其氣寬舒稟性安徐故曰徐徐舒也

張氏曰李巡言淮海間其氣寬舒稟性安徐夫揚州北跨淮南距海何為其性反輕揚乎

淮沂其乂蒙羽其藝

孔氏曰二水已治二山已可種藝

唐孔氏曰地理志云沂水出泰山蓋縣臨樂子山南至下邳入泗過郡五行六百里

班氏曰沂水出泰山蓋縣臨樂子山南至下邳入泗

考隋志已無蓋縣當是南北時并省通典沂州沂水縣當是漢蓋縣之地
蒙山在泰山

蒙陰縣西南

按漢志顯夷國在蒙陰縣蒙山之下通典言沂州費縣史城知費本漢蒙

陰之地

羽山在東海祝其縣南

通典海州朐山縣有羽山殛鯀處後漢志

引博物記云俗謂此山為懲父山祝其晉猶在當南北時廢其地當屬今朐山

酈氏曰沂水出魯城東南尼邱山西北逕雩門門南

隔水有雩壇高三丈曾點所謂風乎舞雩處也沂

水又西逕圓邱北又西注泗水

此曾點所謂浴乎沂之沂非此淮沂

其父之沂也魯即今兗州仙源縣

大野既豬東原底平

孔氏曰大野澤名水所停曰豬東原致功而平言可耕

唐孔氏曰地理志云大野澤在山陽鉅野縣北鉅即大也檀弓云汚其宮而豬焉又澤名孟豬停水處也故云水所停曰豬往前漫溢今得豬水為澤也東原即今之東平郡也致功而地平言其可耕也厥土赤埴墳草木漸包

孔氏曰土黏曰埴漸進長包叢生

唐孔氏曰職埴音義同考工記用土為瓦謂之搏埴之工是埴謂黏土故土黏曰埴易漸象曰漸進也釋言云苞埴也孫炎曰物叢生曰苞齊人名曰埴郭璞曰今人呼叢綴者為埴漸包謂長進叢生言其美也

林氏曰此州之土色而別之則赤性而別之則有埴埴之二種埴者土膏脈起也徐州之地受淮之下流其地墊溺已甚草木不得遂茂為日久矣今也

洪水既平乃至於進長叢生故可書也

葉氏曰包者其本固猶詩言如竹包矣

呂氏曰漸包結實也

張氏曰水患既平土色復其本性故赤黏而墳起草

木復其本性故漸進而叢生

土之性埴者不能墳墳不能埴故林氏以為二種其說甚當而張氏言赤黏而墳起或者其未之察歟包當如易苞桑之苞漸包言浸浸乎其

苞也

厥田惟上中厥賦中中厥貢惟土五色

孔氏曰王者封五色土為社建諸侯則各割其方色
土與之使立社燹以黃土苴以白茅茅取其絜黃
取王者覆四方

唐孔氏曰韓詩外傳云天子社廣五丈東方青南方
赤西方白北方黑上冒以黃土將封諸侯各取其
方色土苴以白茅以為社明有土敬謹絜清也蔡

邕獨斷云天子大社以五色土為壇皇子封為王者授之大社之土以所封之方色苴以白茅使之歸國以立社謂之茅社是必古書有此說故先儒之言皆同也

林氏曰天子之建社必用五色之土而徐州之土備此五色故使貢之也前言赤埴墳此又兼五色者蓋此州之土大抵赤色者最多青黃白黑僅有之而已

羽畎夏翟

孔氏曰夏翟雉名羽中旌旄羽山之谷有之

唐孔氏曰釋鳥云翟山雉此言夏翟則夏翟共為雉
名周禮立夏采之官取此名也周禮司帝云全羽
為旒析羽為旌用此羽為之

林氏曰羽即蒙羽其藝之羽羽畎羽山之畎猶之岱
畎也

嶧

在今兗州鄒縣

陽孤桐

孔氏曰孤特也嶧山之陽特生桐中琴瑟

班氏曰東海下邳縣西有葛嶧山魯國驪縣北有嶧

山今下邳為淮陽軍之縣驪即兗州之鄒縣下邳在南鄒在北二縣蓋相連境則知葛嶧者嶧山

之連延者也

林氏曰嶧陽陽即詩所謂保有鳧繹是也孤桐者特生之桐可以中琴瑟也必以孤桐者猶言孤竹之

管也

泗

出今兗州泗水縣

濱浮磬

孔氏曰泗濱水涯水中見石可以為磬

班氏曰泗水出濟陰乘氏縣東南至臨淮睢陵縣入

淮

乘氏今隸曹州睢陵故城在下邳東陽

唐孔氏曰泗水旁山而過石為泗水之涯石在水旁水中見石似石水上浮然此石可以為磬故謂之浮磬也

林氏曰磬之為器必取其石之最輕者然後其聲清越以長但以其輕故謂之浮不云浮石而云浮磬

者曾氏曰成磬而後貢之

桑氏曰泗水出魯卞縣北山東南過下邳縣西又入

於淮

今兗州泗水縣
即漢卞縣地也

酈氏曰山海經曰泗水出魯東北余昔因公事沿歷

徐沆路經洙泗因令尋其源流水出卞縣故城東

南桃墟西北東南逕下邳縣故城又東逕角城北

而東南流注於淮考諸地說或言於睢陵入淮亦

云於下邳入淮皆非實錄也

下邳在淮陽
宿遷縣界

泗水實出兗之泗水縣而班氏言出乘氏者荷之分濟者也東與泗會故荷泗之稱遂亂

淮夷

地當在淮之口

蠙珠暨魚

孔氏曰蠙珠珠名淮夷二水出蠙珠及美魚

鄭氏曰淮水之上夷民獻此珠與魚也

唐孔氏曰蠙是蚌之別名此蠙出珠遂以蠙為珠名蘇氏曰詩有淮夷知古者淮有夷也

林氏曰唐孔氏云淮夷蓋小水後竭涸不復有其處

耳王肅亦同此說鄭氏謂淮水之上夷民獻珠與魚當從鄭氏之說按詩云憬彼淮夷來獻其琛則是淮夷不得為水名也螾即蚌之別名謂淮上之夷民當此洪水既平之後獻螾珠及魚之二物亦如詩所謂來獻其琛是也

淮夷要服也在徐州之外商之末世蓋有西侵中國之地而居淮水之上者矣武王既定天下通道夷蠻封域之正當盡復古而周公攝政成

王即辟雖嘗服輒叛要東伐之師不容其亂我
華也其後周衰四夷交侵中國淮之南北不復
周有故宣王中興命召公平淮夷以復境土則
知大禹弼成之制其所以限中外而正封圻者
甚嚴也古之興王其經綸之務莫先於此矣

厥篚玄纁縞

孔氏曰元黑繒縞白繒纁細也纁在中明二物皆當
細

唐孔氏曰篚之所盛例是衣服之用此單言元元必有質元是黑色之別名故知元是黑繒也史記稱高祖為義帝發喪諸侯皆縞素是縞為白繒也

顏氏曰元黑繒也纖細繒也縞鮮支也即今所謂素者也言獻黑細繒及鮮支也

曾氏曰縞亦為燕服記曰有虞氏縞衣而養老則知縞又所以為燕服徐州之篚元也纖也縞也凡三物釋者以為元縞為二物以纖為細悞矣

張氏曰淮夷貢篚豈堯科別其民使之供上哉蓋水
患既除物復有生淮中有珠有魚矣可以蠶桑而
為元纖縞矣臣子之心戴上之德以為吾享此安
居衣食此土地而遂其生者其誰之力也故其土
地所出人力所極如珠如魚如元纖縞者皆貢篚
於上以備服食器用以効其區區之誠焉

土翟桐磬較之珠魚元纖縞縱不有輕重而夷
與吾民之貢乃略相叅配何也凡他州夷貢皆

特寡於吾民而此獨相參配蓋其地西當淮口
東據海曲所出之富適在於此故貢之以効來
王之誠而非禹強其與吾民等輕重也序曰任
土作貢經曰庶土交正底慎財賦當於是焉求
禹之用心

浮于淮泗達于河

唐孔氏曰徐州北接青州既浮淮泗當浮汶入濟以
達于河也

班氏曰禹貢浮於淮泗達於河水在山陽湖陵南
蘇氏曰渡二水而入於河汴河右自淮泗入河必道
於汴世謂隋煬帝始通汴入泗禹時無此水道以
疑禹貢之言此特學者考之不詳而已

葉氏曰淮泗之通河久矣隋時浚汴而大之爾汴即
水經所謂汭也

程氏曰菏水南可接泗北可上濟於是經即江海淮
泗荷濟河次比言之其序由南而北悉相灌受無

復間斷而書法所及已言者不復申言截然一律此經書法所謂簡而能該者見矣許氏說文引徐貢本曰達於荷誠為有理湖陵地屬今單州魚臺班氏言荷澤在定陶東泗水出乘氏縣定陶乘氏相去蓋數十里間耳泗水實出兗之泗州縣界安得西與荷澤比乎此蓋荷水分濟而東與泗會合故荷泗之稱遂亂而班氏所以為荷為泗也湖陵之水亦荷也班氏又名為河此皆於

地理未核遂使後人難以稽據許氏以徐貢之
河為荷亦據見水道實跡而於安國所傳之書
有不盡信焉耳程氏深取許而於浮汶道汴之
說皆黜棄之信乎其稽古之審也然於班氏猶
有所假借云荷河二字古多轉借互用果如其
說則徐貢之所謂達於荷者豈不以一字之文
而亂他州之所謂入河達河者乎經書導濟云
東至於荷書豫之治水云導荷澤皆為荷字而

於此獨為河何哉此蓋古文傳寫之誤無疑學者選宗許氏可也程氏此論甚詳余不必悉引

淮海惟揚州

孔氏曰北距淮南距海

李氏曰江南其氣燥勁厥性輕揚故曰揚揚輕也

荊州南境至衡山之陽故杜氏以南越為非九州之域是也南越非九州之域則閩越亦當非而杜氏猶以隸揚州何也考禹治水之迹止及

震澤而史傳稱其巡狩止及會稽則會稽而南
為要荒之地可知矣故言揚州之境者當曰東
距海不當曰南距海

彭蠡

在今江州
及南康界

既豬陽鳥攸居

孔氏曰彭蠡澤名隨陽之鳥鴻雁之屬冬月所居於
此澤

唐孔氏曰彭蠡是江漢合處下云導漾水南入於江
東匯為彭蠡是也日之行也夏至漸南冬至漸北

鴻雁之屬九月而南正月而北左思蜀都賦所云
木落南翔冰泮北徂是也日陽也此鳥南北與日
進退隨陽之鳥故稱陽鳥冬月所居於此彭蠡之
澤也

班氏曰豫章彭澤縣禹貢彭蠡澤在西

今彭蠡澤隸江州九域志

云太平興國七年以江州星子縣置南康軍又以江州都昌縣隸軍有彭澤湖按通典都昌漢彭蠡也縣地也

張氏曰鴻雁江南所在有之何獨止於彭蠡哉其意

以為鴻雁來南至彭蠡而止故今極南如五嶺之外不復見鴻雁矣禹貢之意尚可考也向也洪水滔天彭蠡泛溢不復可辨故鴻雁亦無自而居處今水患既除水復故道彭蠡之水既停蓄而不泛溢故鴻雁至九月亦於此安處也

林氏曰彭蠡之澤蓋是江漢所會之處既豬者水既豬積於此不復汎溢以為民害也陽鳥攸居謂雁來居於彭蠡之澤諸儒之說皆同而竊有疑於此

觀此篇所序治水之詳見於九州之下或山或澤或川或陵或平陸或原隰莫非地名此州上既言彭蠡既豬下言三江既入震澤底定皆是地名而獨於此三句之間言陽鳥攸居非惟文勢之不相稱然考之九州亦無此例也夫雁之南翔乃其天性有不得不然豈其洪水未平遂不南翔乎古之地名取諸鳥獸之名如虎牢犬邱之類多矣左氏昭公二十年公如死鳥杜元凱釋曰死鳥衛地以

是觀之安知陽鳥之非地名乎鄭有鳴雁在陳留
雍邱縣漢北邊有雁門人皆以雁之所居為名陽
鳥意類此意雁之南翔所居地名故取以為名攸
居者水退其地可居也然世代久遠地名之詳亦
無所考雖實疑其如此然亦未敢以為必然也

程氏曰彭蠡自湖口彭澤兩邑之間會於岷漢二江

湖口隸
江州

三江既入震澤

今浙西太湖也

底定

孔氏曰震澤吳南太湖名言三江已入致定為震澤

鄭氏曰三江分於彭蠡為三孔東入海其意言三江

既入入海耳不入震澤也

按其意言以下十五字乃孔穎達疏此誤連引

班氏曰南江在會稽吳縣南東入海

今隸蘇州

中江出丹

陽蕪湖縣西南東至會稽陽羨縣入海

今太平州蕪湖縣即

漢蕪湖縣也通典云漢陽羨縣故城在常州義興縣南太平興國元年義興改為宜興

北江

在會稽毘陵縣北東入海

今常州晉陵縣也

韋氏曰謂吳松江錢塘江浦陽江也

錢塘浦陽一江也安得為二江

郭氏曰岷江浙江松江

顏氏曰三江謂北江中江南江也

此祖安國之說

王氏曰一江自義興一江自毘陵一江自吳縣皆入

海一江在震澤之上二江在震澤之下震澤水有

所洩故底定也上二江今中絕故震澤有水災於

是見此書所記禹跡尚足用以治水也

此祖孟堅之說

蘇氏曰三江之解古今皆不明予以所見考之自豫

章而下入於彭蠡而東至海為南江自蜀岷山至

於九江彭蠡以入於海為中江自嶓冢導漾東流
為漢過三澨大別以入於江匯為彭蠡以入於海
為北江此三江自彭蠡以上為二自夏口以為為
三江漢合於夏口而與豫章之江皆匯於彭蠡則
三江為一過秣陵京口以入於海不復三矣然禹
貢猶有三江之名曰北曰中者以味別也蓋以三
水性不相入江雖合而水則異故至今有三泠之
說古今稱唐陸羽知水味三泠相雜而不能欺不

可誣也

按彭蠡以上為二夏口以上為三二三似互譌檢蘇氏書傳已如此姑仍之

程氏曰蘇氏即中北二江之文以求三江遂以豫章彭蠡之江南出而北會者指為南江以足三江之數是說也於地則有考以經則相應最為愜當而其所以分三江者又求之經文之外故學者信矣而不堅也

林氏曰逐州所序治水之曲折皆是列序其一州之水於其下非必以文勢相屬如下文導岍及岐導

弱水而下也而先儒乃有此蔽如兗州言雷夏既
澤然而考其源委之所注灘沮實未嘗會於雷夏
三江實未嘗入於震澤也然而經言三江既入震
澤底定者蘇氏曰水之未治也東南皆海豈復有
吳越哉及彭蠡既豬三江入海則吳越始有可宅
之土而水之所鍾者獨震澤而已此說是也

為揚州之患者江也為江之患者彭蠡也夫以
三江之水相注鬪激蕩溢以致橫流之多者是

勢之必然者也今也禹之導江必於是焉致其
力大其容而使之安會而不競深岷漢所趨之
地而使之緩來而不奔則三江之入海固不必
用吾力而震澤亦蒙其賜矣經於此州治水首
書彭蠡其規畫尚可想見於數千載之下也一
江名三江考經於會彭蠡之後分辨中北江甚
明當是堯禹時三江既會彭蠡而出則岷漢二
江復分而為二至今下流每分合不常余以秣

陵而下蓋嘗親考之矣經文豈欺我哉程氏以
比西河南河隨方命名其為說非不工然以解
經之導漾東為北江導江東為中江之文終為
不安宜試思之

篠簜既敷厥草惟夭厥木惟喬

孔氏曰篠簜水去已布生少長曰夭喬高也

李氏曰竹節相去一丈曰簜

林氏曰堯徐揚三州皆言草木堯之繇條徐之漸包

揚之天橋皆言草木之茂盛特史官變其文耳雖王介甫之喜鑿亦不能曲為之說

呂氏曰揚克之水尤甚橋與條可知也

天橋盛於漸包漸包盛於繇條言之輕重如此也觀此足以見三州水患之退有遲速而禹之所記亦不容無淺深故也雖然孟子言堯洪水之時草木暢茂益焚山澤以驅禽獸而據此則言水患退而後草木始遂其生何也蓋此記下

濕之地而孟子則言邱山之高民被害欲居之
而禽獸逼人則益不得不焚之耳地有高下之
不同故二書之所言各異苟非窮經未免致疑
於此矣

厥土惟塗泥厥田惟下下厥賦下上錯

張氏曰土惟塗泥謂卑濕也故田第九賦第七水患
既退種植既稀地理增美故雜出第六之賦不計
利害惟使民自貢不立定賦必其上貢此所以為

堯耳

厥貢惟金三品

孔氏曰三品金銀銅也

鄭氏曰金三品者銅三色也

林氏曰三品者金銀銅也鄭氏為銅三色者非也

瑤琨篠簜

孔氏曰瑤琨皆美玉

唐孔氏曰美石似玉者也玉石其質相類美惡別名

也

王氏曰美石次玉者也

林氏曰曾氏曰周禮太宰之職享先王則贊玉爵內
宰之職后裸獻則贊瑤爵禮記尸飲五君洗玉爵
獻卿尸飲七以瑤爵獻大夫公劉之詩曰何以舟
之維玉及瑤則知瑤者玉之次也此說是也琨按
說文石之美者似玉則琨次於瑤可見

曾氏曰按儀禮樂人宿縣蕩在建鼓之間說者以蕩

為笙簫之屬

齒革羽毛惟木

孔氏曰齒象牙革犀皮羽毛鳥羽毛旄牛尾木楸枿豫章

唐孔氏曰詩云元龜象齒考工記犀甲七屬兕甲六屬宣二年左傳云犀兕尚多棄甲則那是甲之所用犀革為上說文云羽鳥長毛也南方之鳥孔雀翡翠之屬其羽可以為飾故貢之也說文云犛西

南夷長旄毛也此犛牛之尾可為旌旗之飾經傳
通謂之旄牧誓云右秉白旄詩云建旄設旄皆此
牛之尾直言惟木不言木名故言榱桷豫章三者
皆是揚州美木故傳舉以言之所貢之木不止於
此

林氏曰齒革羽毛皆是鳥獸之肉可以供器用之飾
者木亦不必指是榱桷豫章謂凡木之貢皆出於
此州也

島夷卉服

孔氏曰南海島夷草服葛越

唐孔氏曰海曲謂之島卉服草服葛服也葛越南方
布名用葛為之冀州云島夷皮服是夷自服皮
非所貢也此言島夷卉服亦非所貢也此與萊夷
作牧並在貢篚之間古史立文不次也

鄭氏曰此州下濕故衣草服貢其服者以給天子之
官

張氏曰冀州島夷以皮為服揚州島夷以卉為服皆自其土地所出而用

林氏曰按此文在於厥貢之下厥篚之上則其為島夷之貢卉服者明矣服既為貢則與冀州皮服從而可知也

厥篚織貝

孔氏曰織細紵貝水物

唐孔氏曰貝織異物織是織而為之貝有居陸居水

此物下濕故云水物

鄭氏曰貝錦名

張氏曰貝水名也至今南方採吉貝織為厚繒可以禦寒亦有冀州島夷以皮之制

林氏曰按荊州云厥篚元纁璣組璣不圓之珠也故者以珠貝為貨珠既入篚則貝亦可以入篚矣然而以織為一物則織之一字無所屬經但曰織安知其為細紵乎鄭氏曰貝錦名凡為織者先染其

絲乃織之則成文矣此說是也蘇氏曰南海島夷
織草木為服如今吉貝木棉之類亦一說也而其
下文又曰其文斑斕如貝亦以成是貝錦為證然
今之吉貝木棉無有所謂斑斕如貝者此說亦未
敢從

厥包橘柚錫貢

孔氏曰小曰橘大曰柚其所包裹而致者錫命乃貢
言不常

唐孔氏曰橘柚二果其種本別以實相比則柚大橘小此物必須裹送以須之有時故待錫命乃貢言不常也

王氏曰橘與柚錫其命而後貢之不常入當繼荊州之無也

張氏曰小曰橘大曰柚揚州所有也至今此物永嘉江西為多第至於致遠故貢篚之外又有包焉包所以封護其外使未遽失土性也此橘柚必錫命

而後貢也

顏氏曰柚似橘而大其味酸橘柚不耐寒故包裹而貢錫貢者待錫命而後貢非金三品齒革之類為每歲常貢

島夷指東南之夷也橘柚錫貢於夷則今永嘉之地其為夷也必矣

沿于江海達于淮泗

孔氏曰順流而下曰沿沿江入海自海入淮自淮入

泗

林氏曰禹之時江未有入淮之道自揚州入於帝都則必由江而入海然後入於淮泗至吳王夫差掘溝通水與晉會於黃池然後江淮始通若禹之時則未有此道也而孟子曰禹疏九河濬濟漯而注之海決汝漢排淮泗而注之江此蓋誤指吳王夫差所通之水以為禹跡其實非也使禹時江已與淮通則何須自江而入海自海而入淮為是之迂

迴也哉

程氏曰泗之北濟之南有菏水者自定陶而下經昌邑金鄉東緡魚臺四邑而與泗水合是水也班固以為河水許叔重以為菏水菏河古字應通然後知徐貢之書達河也非以越濟也正因菏以達也夫惟有菏以為達濟之因則江海淮泗菏濟自南而北交相灌注水道既無闕絕而經文書例已盡者更不再書通此經一律也

孟子於禹貢之書講之素矣豈不知禹之時江
無入淮之道乎孟子去春秋之世近矣又豈不
知吳開邗溝江始有通淮之道乎然而曰禹排
淮泗而注之江者蓋淮之東大抵地平而多水
古溝洫法江淮之所相通灌者非必一處豈但
邗溝之舊跡而已哉林氏之說未可為通論

荆

在今襄州
南漳縣

及衡

在今潭州
衡山縣

陽惟荊州

孔氏曰北據荊山南及衡山之陽

唐孔氏曰此州北界至荆山之北故言據也南及衡山之陽其境過衡山也以衡是大山其南無復有名山大川可以為記故言陽見其南至山南也杜氏曰荆警也或取名於荆山焉

李氏曰荊州其氣燥剛稟性彊梁故曰荊荆彊也曾氏曰臨沮之荆其陰為豫州其陽為荊州

林氏曰孔氏曰北據荆山南及衡山之陽者蓋以衡為大山其南無復有名山大川可以為記故謂南

及衡山之陽然謂北據荆山則不可先儒以為據者皆跨而越之也若兗州東南距濟是越濟而東南也青州曰東北據海是越海而東北也此州與豫州荆山為界荆山之北則豫州也安得跨而越之哉故謂之北距荆山則可謂之據則不可

曰荆及衡陽則陽字上該荆矣如必曰荆陽及衡陽惟荆州此成何等文義曾林二公之說足以証孔氏之誤非深於經文不能也

江漢朝宗于海

孔氏曰二水經此州而入海有似於百川以海為宗
宗尊也

唐孔氏曰詩云沔彼流水朝宗于海毛傳云水猶有
所朝宗朝宗是假人事而言水也老子云滄海所
以能為百谷王者以其下之是百川以海為宗
鄭氏曰江水漢水其流湍疾又合為一其赴海也猶
諸侯之同心尊天子而朝事之

張氏曰如鄭氏所云則止為荆楚言爾所示不廣
林氏曰孟子曰禹之治水也以四海為壑白圭以鄰
國為壑彼禹之治荊州之水欲使荊州之民免於
江漢之患而乃決之於揚州則是以鄰國為壑矣
惟施功也雖導江漢之水於荊州然必使之朝宗
於海而揚州之民亦免於昏墊之患此其所謂以
四海為壑也

二水在此州合流而趨下之勢由是而愈順東

望滄溟有朝宗之象苟不於此州記則揚州正其入海之地不必記矣

九江孔殷

在今岳州巴陵縣即洞庭湖

孔氏曰江於此州界分為九道甚得地勢之中

按以上至

九河既道程氏說刻本所闕今從永樂大典補入

唐孔氏曰江以南水無大小俗人皆呼為江或從江分出或從外合來

劉氏曰湖漢九水入於彭蠡是為九江

桑氏曰九江地在長沙下雋縣西北

下雋即岳州巴陵縣地也

晁氏曰洞庭九江也

林氏曰九江之名與其地世代久遠不可強通然各自別源而下流入江此則可以意曉也

程氏曰九河言播而江不言則江不為九江甚明也然其所以九名當時必有所因不容鑿為之說若其地且據漢世所傳謂在尋陽者為正蓋不敢於去古既遠之世勑為臆說以破近古者之傳也

葉氏曰江出岷山漢出嶓冢皆在梁去海甚遠江至東陵始迤為中江漢至大別始南為北江漢匯澤為彭蠡而江會為匯二水合於一而後入海則導江非至東陵導漢非至大別皆無入海之勢故二水雖發源在梁入海在揚而勢可使自是匯而入海順從而不違者東陵大別之間也故言朝宗乎海九江說者以為洞庭不在尋陽是矣九江荆之舊江也江漢有朝宗之勢則自澧而過至於東陵

其流雖大而無所壅遏故九江不失其舊而甚中也殷中也甚中者宜過中而反不失中之辭也

張氏曰水患既去九江之水皆循故道甚得地勢之中不復泛濫為害也

自夫彭蠡既豬於揚州而江漢於此乃得安會順趨以達於海而其上合流之西有九江者於是亦從而孔殷焉沱潛也雲夢也皆由此而治也是皆禹之導水自下而上而彭蠡者荆揚腹

心之疾也先有以治之而二州之水害去矣說者惟不識此故不求九江於江漢合流之上而求之於合流之下此說之所以紛紛而終莫可信執也胡不玩經文而思之乎胡不以江漢九江沱漢雲夢次比其地勢而觀之乎始余讀衆說無一當余心者及以葉氏之論詳之然後知余每論大禹治水之規畫頗有可信者九江不必求其有九然後為是如太湖一湖而得名五

湖昭餘祁一澤而得名九澤皆不可以數求也
今之洞庭當是堯禹之時名為九江無足疑者
不然則澧之下東陵之上有水大如洞庭而為
江所過者禹顧不書何耶

沱潛既道

沱出今江陵石首縣
潛當在江陵潛江縣

孔氏曰沱江別名潛水名皆復其故道

唐孔氏曰釋水云水自江出為沱漢出為潛而孔梁
州註云沱潛發源此州入荊州以二州沱潛為一

者蓋以水從江漢出者皆曰沱潛但地勢西高東下雖於梁州合流還從荊州分出猶如濟水入河還從河出

班氏曰江沱出南郡枝江縣西東入江

枝江唐隸江陵府熙寧六

年省入松滋縣為鎮

鄭氏曰枝江之沱尾入江耳首不於江出也華容有夏水首出江尾入沔蓋此所謂沱也潛則未聞象

類

按通典江陵石首縣即漢華容縣也在府東南二百里縣治正臨大江之南地理志云夏水受

江入沔行

五百里

蘇氏曰枝江沱水華容夏水此荊州之沱潛也郢縣沱水安陽潛水此梁州之沱潛也以安國穎達之言考之味別之說古人蓋知之久矣梁州荊州相去數千里非以味別安知其合而復出耶

林氏曰據爾雅之言是凡水之出於江漢者皆有此名也出於荊者荊之沱潛也出於梁者梁之沱潛也要之皆是自江漢而出不必有合流味別之說

程氏曰水自河出為澨故克有澨沮之澨而後世亦以宋水之受汭者為澨不限一水也江有沱之詩始曰沱中曰汭終曰渚三者輾轉變稱皆取聲協亦可以見其不主一地不專一名也是皆可以類推者然則凡水之出江漢皆可以名沱潛則沱潛云者乃從江漢下流得名耳荆貢自漢陽以上浮漢支水皆為潛浮江支水皆為沱

鄭氏不以枝江沱水為此之沱以其非從江出

故也而東坡指以為是蓋亦姑從漢志云耳余
考枝江之地隸今松滋松滋在江陵西南亦安
知枝江之水不於江出而復入江耶至若鄭氏
以夏水為沱而東坡則指以為潛此東坡之疎
耳何者夏水首出江於華容之境行五百里東
入沔此正合爾雅江出為沱之說而東坡以為
潛非也然則潛不可得而知歟國初乾德中以
漢江陵縣地置潛江縣在荆南東北百有餘里

或者水有自漢而來名之曰潛故縣因以名歟
程氏求沱潛於漢陽而上之地得之矣

雲土夢作入

雲在安州安陸
夢在江陵石首

孔氏曰雲夢之澤在江南其中有平土邱水去可為
耕作畎畝之治

唐孔氏曰昭三年左傳云楚子與鄭伯田於江南之
夢定四年左傳云楚昭王寢於雲中則此澤亦得
單稱雲單稱夢經之土字在二字之間蓋史文兼

上下也地理志華容縣南有雲夢澤杜預云枝江

縣西有雲夢城江夏安陸縣亦有雲夢

安陸今隸安州

或

曰華容東南有巴邱湖江南之夢雲夢一澤而每處有名者相如子虛賦云雲夢者方八九百里則此澤跨江南北每處名存焉

小司馬氏曰雲夢本二澤名蓋人以二澤相近或合稱雲夢耳左傳云昭王寢於雲中又楚子鄭伯田於江南之夢則是二澤各別也

蘇氏曰據春秋傳所載則雲與夢二土名也而云雲土夢者古語如此猶曰元纁縞云爾

王氏曰雲之地土見而已夢之地則非特土見而已草木生之矣非特草木生之而已人有加功又之者矣

在安陸者雲也在漢之東在華容者夢也在江之南二澤夾江漢於其中而各自鍾水於江漢之外者也後世以其地望相近故總稱雲夢焉

耳考此又以知經云沱潛既道雲土夢作乂者以江漢支流俱治而其傍之澤無復泛溢之患也雲土者言濱雲之土復其舊也夢作乂者言濱夢之人皆作乂也此則上下互見其義

厥土惟塗泥厥田惟下中厥賦上下

孔氏曰田第八賦第三人功修

林氏曰此州之土雖同揚州之塗泥然其地稍高故其田加於揚州一等

金匱要略卷二
厥貢羽毛齒革惟金三品

孔氏曰土所出與揚州同

唐孔氏曰揚州先齒革此羽先羽毛者蓋以善者為
先由此言之諸州貢物多種其次第皆以當州貴
者為先也

林氏曰按職方氏揚州其利金錫荊州其齒革革則
是二州之所產不無優劣可見矣

張氏曰徐州浮磬先於蠙珠豈可謂珠不如石乎梁

州鐵先於銀豈可謂銀不如鐵乎穎達之說過矣
此當以文體為言

所出適饒於此而且善故先之非以二物之貴
賤等輕重也張氏之辯雖巧而實非

枕榦栝柏礪砥砮丹

孔氏曰榦栝也柏葉松身曰栝砥細於礪皆磨石也
砮石中矢鏃丹朱類也

唐孔氏曰考工記云弓人取榦之道也以栝為上釋

木云栝柏葉松身陸璣毛詩義疏云栝櫟漆相
似如一栝栝柏皆木名也以其所施多矣栝木惟
用為弓幹弓幹莫如栝木故舉其用也砥以細密
為名礪以麤糲為稱鄭云礪磨刀刃石也精者曰
砥魯語曰肅慎氏貢楛矢石砮賈逵云砮矢鏃之
石也丹者丹砂王肅云丹可以為采

顏氏曰丹赤石也所謂丹砂者也

曾氏曰揚州貢木不言其名所貢之木不可勝名也

此州曰桤榦栝柏其所貢者止此而已

張氏曰今辰溪丹砂醫方所貴正荊州分域也

惟箇籐栝三邦底貢厥名

孔氏曰箇籐美竹栝中矢榦三物皆出雲夢之澤近
澤三國常致貢之其名天下稱善

陸氏曰韋昭云箇一名聆風也馬云栝木名可以為
箭毛詩草木疏云葉如荆而赤莖似蓍

唐孔氏曰鄭云箇籐聆風也竹有二名或大小異也

筩簞是兩種竹也傳言三物皆出雲夢之澤當時
驗之猶然

顏氏曰筩簞竹名栲木名皆可為矢

蘇氏曰三邦大國次國小國也柹榦栲柏礪砥砮丹
與筩簞栲皆物之重者荊州去冀最遠而江無達
河之道難以必致重物故使此州之國不以大小
但致貢其名數而準其物易以輕賁致之京師重
勞人也

張氏曰三物貢其尤美者厥名猶言尤美也

林氏曰考工記云材之美者有妣胡之筍鄭云妣胡

胡子之國在楚旁意者即三邦之故地歟

呂氏曰凡枕榦及楮十物非朝廷所常用必使之貢
則勞民不使之貢則有用而或闕故惟使貢其名
名者列其條目而貢之也見聖人處事之精審如
此

包匭菁茅

孔氏曰包橘柚匭匣也菁以為菹茅以縮酒

唐孔氏曰周禮醢人有菁菹鹿藿鄭云菁蔓青也蔓青處處皆有而今此州貢者蓋以其味善也僖四年左傳齊桓公責楚云爾貢包茅不入王祭不供無以縮酒周禮甸師云祭祀共蕭茅鄭興云蕭字或為蒿蒿讀為縮束茅立之祭前沃酒其上酒滲下去若神飲之故謂之縮

鄭氏曰菁茅一物也匭猶纏結也菁茅茅之有毛刺

者重之故既包裹而又纏結也

王氏曰包匭菁茅者包且匭也物或篚或包至菁茅則包且匭者正以供祭祀故嚴之也

張氏曰安國謂匭為匣而礙於包故以包為橘柚康成以包為裹而礙於匭故謂匭猶纏結余謂二物雖微專以供祭祀而非他用豈可不謹哉故以匭藏菁茅矣又以怕複包匭而致嚴也學欲通古今不因見今日之用複怕包盤杆之屬則包匭之說

終為孔鄭所惑矣

厥篚玄纁璣組

孔氏曰此州涿元纁色善故貢之璣珠類生於水組
綬類

唐孔氏曰釋器云三涿謂之纁李巡云三涿其色已
成為絳纁絳一名也說文云璣珠不圓者玉藻說
佩玉所懸者皆云組綬是組綬相類之物也

張氏曰組此州所善織絳者

九江納錫大龜

孔氏曰尺二寸曰大龜出於九江水中龜不常用錫命而納之

唐孔氏曰史記龜策傳云龜千載滿尺二寸漢書食

貨志云元龜距冉長尺二寸

孟康注云冉龜甲緣也距至也度背兩邊

緣尺二寸也

杜氏曰蘄州廣濟縣蔡山出大龜書云九江納錫即此

杜氏亦附會漢儒九江之說耳要禹時大龜不
必蔡山者是

薛氏曰大龜國之所寶其不得可以為常貢又不可
錫命使貢惟使有之則納錫於上先儒多以為錫
命乃貢此則何以異於錫貢哉

浮于江沱潛漢逾于洛至于南河

孔氏曰逾越也河在冀州南東流故越洛而至南河
葉氏曰江沱潛漢與河皆不通故必陸逾於洛而後

至於南河

曾氏曰自漢而逾洛

張氏曰順流而下曰浮自荊州順江流以入沱自沱
順流以入潛自潛順流以入漢至漢則捨舟陸行
以入洛自洛以入於南河

程氏曰荆之貢不徑浮江漢而兼用沱潛者隨其貢
物所出之便或由正逕或循支派期便於事而已
也邇漢之極無水可浮則陸行至洛以期達河故

曰浮於江沱潛漢逾於洛至於南河也

自孔安國有順流曰浮之說學者多信之而孔
竊有甚疑者豫貢浮於洛達於河順流也雍貢
浮於積石至於龍門西河亦順流也而濟漯受
河而東流兗貢浮濟漯以達於河果為順流乎
泗水東流入淮徐貢自淮以浮泗自泗以達河
果為順流乎況荆貢所謂浮於江沱潛漢正如
程氏各隨其便之說而逾洛則是溯漢而上無

水可以通河故捨舟陸行以入洛由洛以至於河耳又安可謂浮漢為順流乎浮也者舟行水上之謂安國不究經始末而輕為之解學如無垢亦為所誤信哉程氏用功於禹貢也深而昔者余之所疑亦因是而判然矣

荆河惟豫州

孔氏曰西南至荆山北距河水

李氏曰河南其氣安舒厥性寬豫故曰豫豫舒也

杜氏曰豫在九州之中言常安逸也又云豫者舒也
言稟中和之氣性理安舒也

蘇氏曰自北條荆山至於河為豫州北條荆山至河
甚近當是跨荆而南猶濟河惟兗州也

林氏曰蘇氏之意蓋謂荊州之言荆者南荆也豫州
之言荆者北荆也雖以此二山分配二州然以地
理考之其實不然北荆與河相去不甚遠苟以荆
山為北荆之荆則豫州之境不應如是之狹也曾

氏曰臨沮之荆其陰為豫州其陽為荊州此說是

也

伊

出今虢州盧氏縣
熊耳山東北入洛

洛澗

出今
京河南縣
穀城山東南入洛

澗

出今
京新安

縣東南
入洛

既入于河

孔氏曰伊出陸渾山洛出上洛山澗出沔池山澗出

河南北山四水合流而入河

唐孔氏曰志云伊水出盧氏縣東熊耳山傳云陸渾

山者熊耳山在陸渾縣

唐先天元年割陸渾置
伊陽伊陽今隸西京

志

云洛水出上洛縣冢領山傳云上洛山者冢領山

在上洛縣境之內

上洛今隸商州

志云瀍水出穀城縣潛

亭北傳云河南北山者穀城潛亭北即是河南境

內之北山也

通典洛州河南縣有穀城山瀍水所出古穀城在縣西北後漢志引博物

記曰瀍水出潛亭山

志云澗出新安縣傳云沔池山者沔池

在新安縣西也志詳而傳略所據小異耳

沔池今隸西京

伊瀍澗三水入洛合流而入河言其不復為害也

林氏曰據伊瀍澗入於洛而洛入於河此言伊洛瀍

澗則以四水列言者曾氏曰漢水入於江以入海而荊州言江漢朝宗於海與此同意蓋其水之大小相敵也

下文導洛言東北會於澗渥又東會於伊此序水之次第自上而及下也此言伊洛渥澗乃治水之先後自下而及上也曾林二公不知察此而求為大小相敵之說夫三水入洛而洛得兼三水而為大顧謂之相敵可乎不然則禹數九

川浴與其一奚為而三者不言也

滎波

在今鄭州滎澤縣

既豬導荷澤

在今曹州定陶縣界

被孟豬

在今南京宋城

縣

孔氏曰滎澤波水已成過豬荷澤在胡陵孟豬澤名

在河東北水流溢覆被之

唐孔氏曰地理志山陽郡有胡陵縣

章帝更名湖陸至晉不改其後

不知廢於何時

不言其縣有荷澤也又云荷澤在濟陰定

陶縣東孟豬在梁國睢陽縣東北以今地驗之則

湖陵在睢陽之東定陶在睢陽之北其水皆不流
溢東北被孟豬也然郡縣之名隨代變易古之胡
陵當在睢陽之西北故得東出被孟豬也於此作
孟豬左傳爾雅作孟豬周禮作望諸聲轉字異正
是一道也

許氏說文云菏水出山陽胡陵南正與孔傳同
而班固以為在定陶何也蓋在定陶者其澤也
在湖陵者其流也其流東與四合正在今單州

之魚臺魚臺在單之東北百里而近正古湖陵地也而孟豬在睢陽東北則所謂被孟豬者導荷流之在定陶魚臺間者以被之於南也安國惟說荷之源委不明且誤言孟豬在荷東北是以致穎達疑甚而有古胡陵當在睢陽西北之說余不極力窮之終為二公所惑而況能明禹跡始終經畫之妙耶

顏氏曰言治荷澤之水衍溢則使被及孟豬不常入

也

葉氏曰孟豬荷澤其相去遠被及也猶言西被於流沙者導荷澤被孟豬言水僅相及而孟豬之蓄不以荷澤也

林氏曰職方氏曰其川滎雒其浸波澹鄭云滎沇水也波讀曰播禹貢曰滎播既豬顏氏曰波亦水名曾氏曰爾雅云水自洛出為波觀此諸說則滎波之為二水明矣

唐孔氏曰洪水之時滎澤水大動成波浪今時已成過滎則是言滎波為一水也顏師古雖言波亦水名又言一說謂滎水之波則姑存兩說而不敢斷也林氏專主職方所記以為當是水固不為無據之說然以余考之上文言導洛此則專主導濟而言不當又泛言洛之支水職方所記山川非治水次第不必泥也雖然導水之法大抵自下而上至此則先言伊洛瀍澗之

入河而後次及於滎荷何也蓋洛濟入河處不甚相遠平時洛併諸水之力附河而下濟猶有所不堪而況其橫流浩蕩之時滎澤所承其有不為害之慘乎禹謀度之先皆灼知此利病故其經始河患施濬濟之功必先䟽四水以循故道而滎波固可豬矣滎波既豬則荷澤固可無患而猶導其流以被孟豬者所以殺其餘溢而亦預為他日洩水之地也反覆叅究禹之規畫

如在吾目吾殆不知手之舞之足之蹈之也

厥土惟壤下土墳壚

孔氏曰高者壤下者壚疏

許氏曰壚黑剛土也

唐孔氏曰直言壤不言其色蓋州內之土不純一色故不復得言色也

厥田惟中上厥賦錯上中

孔氏曰田第四賦第二又雜出第一

壤者和緩之謂也墳者不黏埴之謂也此州兼
有二土田宜若最上而止居第四者以下土又
有黑剛之處非播種所宜故也履歷農郊利害
在目君子其可忽於此乎

厥貢漆枲絺紵厥篚織纈錫貢磬錯浮於洛達於河

孔氏曰纈細綿治玉石曰錯治磬曰錯

唐孔氏曰纈是細故傳言細綿

顏氏曰紵纈紵為布及練也

王氏曰磬錯二物不常貢錫命乃貢

張氏曰揚州言厥包橘柚錫貢荊州言九江納錫大
龜二州去冀都甚遠其待錫命則有說矣豫州北
近冀都而磬錯亦以錫貢聖賢之惜人力如此則
夫崇飾臺榭以為遊觀輦運土木以資妄費皆聖
賢所深惡矣可不戒哉

林氏曰職方氏云豫州其利漆枲則是漆枲之類此
州之所宜也織纊諸儒皆以為細綿然為二物亦

未可知也

華陽黑水惟梁州

華山在今華州華陰縣

孔氏曰東據華山之南西距黑水

唐孔氏曰周禮職方氏豫州其山鎮曰華山在豫州界內此梁州之境東據華山之南不得其山故言陽也此山之西雍州之境也

杜氏曰以西方金剛其氣強梁故曰梁州

曾氏曰華山之陰為雍州其陽為梁州

岷

在今茂州汶山縣

嶓

在今秦州界

既藝沱

在今彭州永昌縣界

潛

此漢別出於嶓東南

至恭州巴縣入江

既道

孔氏曰岷山嶓冢皆山名水去已可種藝沱潛發源

此州入荊州

唐孔氏曰漢制縣有羌夷曰道地理志云蜀郡有湔

氐道岷山在西徼外江水所出也隴西郡西縣嶓

冢山西漢水所出也沱出於江潛出於漢二水發

源此州而入荊州故荊州亦云沱潛既道

班氏曰禹貢江沱在蜀郡郫縣西東入大江又曰江

沱在蜀郡汶江縣西南東入江

郫今隸成都府汶江即今茂州汶川

縣地 驚谷水出漢中安陽縣西南北入漢

通典云金州安陽縣

即漢安陽縣也晉改安陽唐至德二年又改為漢陰今仍漢陰名

鄭氏曰郫之沱安陽之潛其尾入江漢耳首不於江

漢出江源縣有郫江首出江

案隋志後周改江原曰晉原今隸蜀州

南至犍為武陽縣又入江豈沱之類歟

通典云眉州彭山縣

即武陽地也

潛蓋漢西出岷冢東南至巴郡江州入江

者

通典云江州縣故城在渝州巴縣西今渝州改為恭州

郭氏曰沱水自蜀郡都水縣楠山與江別而東流又

曰有水從漢中沔陽縣南流

沔陽晉猶存九域志興元古迹有沔陽城

至梓潼漢壽入大穴中通峒山下西南潛出一名

沔水舊俗云即禹貢潛也

案晉志云劉備據蜀改葭萌曰漢壽西晉泰始

三年又改漢壽為晉壽後孝武分梓潼北界立晉壽郡統晉壽等縣案通典利州晉屬晉壽郡縣無知何時復此舊名

林氏曰沱在彭州唐昌

本朝開寶四年始改為永昌

又曰沱

在益州郫縣西小司馬氏曰郫之沱安陽之潛
是也以漢志通典考之以地勢觀之則是沱水
別流於茂州汶川之境逕彭州永昌又逕成都
郫界復東入大江明矣鄭氏謂在郫之沱首不
江出此蓋未嘗深考源委曲折故也若潛水惟
鄭氏所指西漢與經浮潛正合請辯于後

葉氏曰江漢見於荊者既朝宗于海則已治矣故於
發源無所用力特言岷嶓既藝則不特水治也

林氏曰江漢二水發源此二山當其泛溢悍怒而未有所歸則其發源之山亦為水所浸灌而不得遂其播種之利今既疏導以入于海則岷嶓二山所出之水皆順流而東則此二山遂可種藝矣

治江漢之水由東而西上亦既極其源矣而分派旁流者又已俱治則梁州之大功畢矣萬世之下想象禹之規畫何其簡易精當如此也

蔡蒙旅平

二山皆在雅州嚴道縣

和夷底績

嚴道和州鎮即和夷之故地也

孔氏曰蔡蒙二山名祭山曰旅平言治功畢和夷之地致功可藝

唐孔氏曰地理志云蒙山在蜀郡青衣縣應劭云順帝改曰漢嘉縣蔡山不知所在和夷平地之名

鄭氏曰蔡蒙皆在漢嘉縣

杜氏曰雅州嚴道縣有蒙山禹貢云蔡蒙旅平謂此

也漢嘉不知廢於何時案晉志屬漢嘉郡今雅州晉漢嘉郡也其地當在嚴道之境

王氏存曰雅州蒙頂山即書蒙山也

蘇氏曰蒙山今曰蒙頂和夷西南夷名

林氏曰據漢志青衣但有蒙山無蔡山不知鄭氏何
所據而知蔡山亦在漢嘉當姑闕之鄭氏謂和為
夷所居之地而曾氏本鄭說以謂自嚴道而西地
名和川夷人居之今為羈縻州者三十有七則經
所謂和夷者也蘇氏亦以和夷為西南夷名若此
諸說皆可信今雅州猶有和川鎮此即和夷之故
地也

和夷者東近蒙蔡之夷也蔡蒙旅平則和夷底績矣此梁州西南最遠之地言旅平於此所以示告終也

厥土青黎厥田惟下上厥賦下中三錯

孔氏曰色青黑而沃壤田第七賦第八雜出第七第九三等

愚謂差等之處有三第六第七第九也八不與其中

唐孔氏曰王肅云黎小疏也

顏氏曰色青而細疏

曾氏曰梁州山水俱多故其賦比九州為下等

獨言色之青黑而不及其性則非壤非墳為土
之剛瘠可知矣使其果為沃壤如孔氏之說則
田宜上品而顧乃止居下上何耶

厥貢璆鐵銀鏤砮磬

孔氏曰璆玉名鏤剛鐵

唐孔氏曰釋器云璆琳玉也郭璞云璆琳美玉之別名鐵者可以刻鏤故為剛鐵也

曾氏曰蜀郡卓氏至以鐵冶富擬邦君則梁州之利尤在於鐵故言鐵先於銀也

熊羆狐狸織皮西傾因桓是來

孔氏曰貢四獸之皮織金罽西傾山名桓水自西傾山南行因桓水是來浮於潛

唐孔氏曰與織皮連文必不貢生獸故傳云貢四獸

之皮釋言云毳屬也舍人曰毳謂毛屬也胡人續
羊皮作衣織毛而言皮者毛附於皮故以皮表毛
耳地理志云西傾在隴西臨洮縣西南西傾在雍
州自西傾山南行因桓水是來浮於潛水也地理
志云桓水出蜀郡蜀山西南行羌中入南海則初
發西傾未有水也不知南行幾里得桓水也

馬氏曰治西傾山因桓水是來言無他道也

鄭氏曰桓水出西傾山

杜氏曰西傾山在洮州西南吐谷渾界桓水所出

鄭氏曰桓是隴阪之名其道盤桓旋曲而上故名之

曰桓

蘇氏曰西傾桓水出焉桓入潛潛入沔

葉氏曰雍言織皮崑崙析支渠搜西戎即叙則織皮

非中國之貢也疑西傾即西戎之境熊羆狐狸織

皮文當與西傾因桓是來相屬謂此四獸之皮西

傾之戎因桓水而來貢也

西傾雍州之山也西傾之戎胡不浮積石至于龍門西河而必道梁州之界何也因有桓水之便較積石為近故舍彼而從此焉耳是來云者是指梁州言也酈杜諸公皆言桓水出西傾於經文為順而班固以為出蜀郡之山非也

浮于潛

水凡出於漢者皆名潛則漢志安陽驚谷之水與郭氏所引沔陽南流之水皆謂之潛可也若

此所浮之潛則當以鄭氏所指漢西出者為正
蓋主之以經文參之以地理則桓水自西傾來
東與之會者惟以西漢水當之可也苟舍是而
他指於西漢之東則桓水其能越西漢乎

逾于沔

孔氏曰漢上曰沔又曰泉始出山為漾水東南流為
沔水至漢中東行為漢水

班氏曰沮水出武都沮縣東狼谷山

今興州順政縣
漢沮縣之地也

南至沙羨南入江

羨音夷漢屬江夏郡
即今鄂州江夏縣

過郡五行

四千里荊州川其記禹貢養水則曰出隴西氐道

縣

當在秦
州之西

至武都為漢

今階州將利
漢武都地也

其武都縣注

則曰東漢水受氐道水一名沔過江夏謂之夏水

入江其南郡華容縣注則又曰夏水首受江東入

沔行五百里

應氏曰沔水自漢別至南郡華容為夏水過江夏郡

入江故郡曰江夏

杜氏曰沔水發源興利順政縣一名沮水又曰沔州

漢陽縣有漢水一名沔水

漢陽令為軍

鄭氏曰或謂漢為沔

劉氏曰巴漢志云漢水二源出氐道之養山名養南

都賦注曰漢水源出隴西經武都至武關山厯南

陽界出沔口入江巴漢志曰西漢出隴西嶓冢山

會白水經葭萌入江

案廣漢郡有白水縣注云水出徼外北入漢案通典利州

景谷縣漢白水縣也今利州無景谷但昭化有白水鎮當是唐家五代廢人

桑氏曰漾水出隴西嶓冢山東至武都沮縣為漢又

曰漢水更南過巴郡閬中縣

今閬州

鄠氏曰東西兩川俱出嶓冢同為漢水雖津流派別

枝渠勢縣原始要終潛流或一故俱受漢漾之名

又曰東西兩川
俱受沔漢之名

程氏曰漾水不出西縣嶓冢山却出武都沮縣東狼

谷山而東流入漢中若以東狼谷山所出之水為

漢源則東狼谷山當為嶓冢矣西漢嘉陵江水也

自高祖置廣漢郡以後人見嘉陵江來自興鳳與漢中接境又郡名廣漢遂誤名嘉陵以為漢水耳

東西漢水辯

班氏言漢水出隴西氐道而劉氏引巴漢志又言出氐道養山是皆水源實跡而非鑿空遽為之說也今考氐道地當在秦州之西而岷冢山者養山以東之山也漾水發源養山而東逕岷冢其水別為一流東南至江州入江者即後世

所謂西漢而禹時所浮之潛也以地勢考之既
會桓水為順而於經之浮潛又合顧何必致疑
於其間而又泛求之他乎學者如考經之詳當
自以余說為當

漢沔辨

杜氏言沮縣東狼谷之沮即沔水也沔出沮縣
東狼谷而漾出隴西氐道則沔漾之源班氏固
未嘗以為一也及記漾水至武都為漢則曰東

言終南惇物至于烏鼠者自終南至烏鼠皆刊旅也

終南

在長安縣

惇物

在武功縣

至于烏鼠

孔氏曰三山名言相望

唐孔氏曰三山空舉山名不言治蒙上既旅之文也

班氏曰扶風武功縣大壺山古文以為終南垂山古

文以為惇物皆在縣東

葉通典京兆長安縣有終南山而班氏以為即武功

大壺山當是唐以

來其山屬長安

林氏曰九州之地西北多山東南多水雍州在西北故其山為最多揚州在東南故其水為最多觀此篇之所載可以見矣秦都長安在雍州所謂百二之險者惟其山多故也

凡此下文所謂導山益稷篇所謂濬畎澮距川是也

案荆在耀州導荆則或導其水於河或導之於漆沮也岐在鳳翔導岐則或導其水於涇或導

之於渭也終南在長安惇物在武功此又或導
於澧或導於渭各隨其利順焉耳至於烏鼠則
渭之發源是也其上下左右之水皆導之以入
渭則又不言可知矣禹記每州治水山川表裏
交相發明而導山導川又叙其始末之詳於後
讀此書者叅會而觀之其庶乎不為童習之懣
然而發之文章言語間當有意味學者將皓首
猶童習乎抑將童習蚤為之所乎

原隰底績

今別州之地

至于豬野

在於涼州

孔氏曰下濕曰隰豬野地名言皆致功

唐孔氏曰鄭元以為詩云度其原隰即此原隰是也

原隰豳地從此致功西至豬野之澤也

班氏曰休屠澤在武威縣東北古文以為豬野澤

杜氏曰涼州姑藏縣有豬野澤

今為化外地

原隰至豬野亦猶惇物至鳥鼠雖其地相去甚

遠而當時施功由下而上者不極其所當治不

已也大抵禹之治水其大而要者既先導之使
有歸小而渙散者又各濬之使有距夫然後為
澤自爾豬為平地自爾安而陂障修治之功易
矣原隰近涇渭豬野近河弱

三危既宅三苗丕叙

孔氏曰西裔之山已可居三苗之族大有次叙美禹
之功

唐孔氏曰禹治水未畢已竄三苗水災既除彼得安

定

林氏曰舜竄三苗之始蓋在洪水未平之前及乎洪水既平之後三危之地既可安居則三苗之族於是始得其叙

業經舜竄三苗在受終之年而唐孔氏諸公以為受終之年洪水已平若受終之年洪水已平則竄三苗在洪水已平之後禹於此預記其不叙何邪穎達為今之說正與經合雖自背於前

不覺也三危既定此治黑水之成功

張氏曰舜之遷逐四凶終無疾惡之心必欲使之大有次叙安其居止而無憂愁不聊之苦而後已此聖人之心也

呂氏曰三苗不道竄於三危自後世觀之凡以罪流放者聽其自殘自生在所不恤聖人之心不如此方其有罪必行竄棄刑行之後施仁發政自當同及故禹治水至三危亦為畫其居宅其與漢文時

所論王制不同

厥土惟黃壤厥田惟上上厥賦中下

孔氏曰田第一賦第六人功少

唐孔氏曰此與荊州賦田升降皆較六等荊州升之極故云人功修此州降之極故云人功少其餘相較少者從此可知也王制曰凡居民量地以制邑度地以居民地邑民居必參相得也則民當相準而得有功修人功少者記言初置邑者可以量之

而州境闊遠民居先定新遭洪水存亡不同故地勢有美惡人功有多少治水之後即為此差在後隨人少多必得更必其等此非永定也

林氏曰凡天下之物得其常性者最為可貴土色本黃此州之土黃壤故其田為上上而非餘州之所及也

厥貢惟璆琳琅玕

孔氏曰璆琳琅皆玉名琅玕石而似珠

浮于積石至于龍門西河會于渭汭

孔氏曰積石山在金城西南河所經也沿河順流而北千里而東千里而南龍門山在河東之西界逆流曰會自渭北涯逆水西土

唐孔氏曰會合也人行逆流而水相向故逆流曰會從河入渭自渭北涯逆水西上言禹白帝訖從北而西上更入雍州界也諸州之末惟言還都之道此州事終言發都更去明諸州皆然也

林氏曰此州之達於帝都有二道浮于積石至于龍門西河者一道也自渭汭以達於河者又一道也渭汭之道亦底龍門西河故以會言之非至于龍門西河乃始會于渭汭也

程氏曰雍之貢入有兩道其北道自後世朔方西涼浮河者無所因於他州故特記其詳曰浮于積石至于龍門西河其南道自今陝西入河者與梁之北貢所謂浮渭入河者同道而可以會合積石之

貢於河故又因梁州前文而特致其略止曰會于渭汭而已其義例與梁荆一律也

會言貢道之會非會貢也

織皮崑崙析支渠搜西戎即叙

孔氏曰織皮毛布有此四國在荒服之外流沙之內羌髳之屬皆就次叙美禹之功及戎狄也

唐孔氏曰四國皆衣皮毛故以織皮冠之四國崑崙也析支也渠也搜也鄭氏曰衣皮之民居此崑崙

析支渠搜三山之野者皆西戎也王肅云崑崙在
臨羌西析支在河關西西戎西域也王肅不言渠
搜鄭併渠搜為一孔傳不明或亦以渠搜為一通
西戎為四也

案陸氏引馬云崑崙在臨羌西析支在河關西
與王肅所言正合臨羌河關皆漢金城郡之縣
也陸氏又云漢志朔方郡有渠搜縣武紀云北
發渠搜是也然以余考之漢朔方之渠搜非此

所謂渠搜此亦當是金城以西之戎也後世種落遷徙故漢有居朔方者若禹時渠搜居朔方則不應浮積石陸氏之說非也

蘇氏曰禹貢之所篚皆在貢後立文而青徐揚三州皆萊夷淮夷島夷所篚此云織皮崑崙析支渠搜西戎即叙大意與上三州無異蓋言因西戎即叙而後崑崙析支渠搜三國皆篚織皮但古語有顛倒詳略耳其文當在厥貢惟璆琳琅玕之下其浮

于積石至于龍門西河會于渭汭當在西戎即叙
之下以記入河水道結雍州之末簡編脫誤不可

不正

梁州言熊羆狐狸織皮此獨言織皮者蒙上文
也此言西戎即叙梁州止言西傾者以下文該
之也

禹貢說斷卷二